

ՎԱՍՊՈՒՐԱԿԱՆ ՎԱՐՉԱՆՇԽԱՐՀԱԳՐԱԿԱՆ ՄԻԱՎՈՐԻ
ԱՌԱՋԱՑՄԱՆ ՊԱՏՄՈՒԹՅՈՒՆՆԵՐ

Վ. Մ. ՎԱՐԴԱՆՅԱՆ

Վասպուրականը, որպես վարչաաշխարհագրական միավոր, ունեցել է պատմական զարգացման տարբեր փուլեր: Վաղ շրջանում նրա սահմանները անհամեմատ ավելի փոքր են եղել, քան այն, ինչ ներկայացված է VII դարի Աշխարհացույցում: Արտաշիսյանների և Արշակունիների օրոք Վասպուրականը համեմատաբար փոքր միավոր էր, որն ընդգրկում էր հետագայում (591 թ. հետո) կազմավորված Վասպուրական նահանգի Աղիովիտ և Առքերանի (նաև Հաշտյանք) գավառները: Այսպիսի եզրակացության կարելի է հանգել հենվելով Մովսես Խորենացու տվյալների վրա: Հայտնի է, որ հայոց Արշակունիների տոհմում արմատացած սովորության համաձայն, Այրարատում բնակվելու իրավունք ունեին միայն հայոց թագավորը և նրա թագաժառանգ որդին: Թագավորի մյուս որդիներին՝ արքայատոհմի սեպուհներին, արգելված էր Այրարատում բնակվել: Նրանց ի սեփականություն էին տրված հետագայի Վասպուրական նահանգի Աղիովիտ և Առքերանի գավառները, նաև Հաշտյանքը: Հայոց թագավոր Արտավազդ II-ը, հավաստում է Մովսես Խորենացին, ժառանգեցության զեղբարս իւր և զքորս ի գաւառս Աղւո ուլտի և Առքերանոյ, թողլով ի նոսա զմասն արքունի որ ի շէնսն այնց գաւառաց, հանդերձ առանձինն մտից և ռոճկաց, ըստ օրինակի ազգականացն որ ի կողմանս Հաշտենից. որպէս զի լինել նոցա պատուականագոյն և առաւել թագաւորազն քան զայնս Արշակունիս. միայն օրինադրէ ոչ կեալ յԱյրարատ ի բնակութիւնս արքայի»¹:

Ուշագրավ է նաև պատմագրի մեկ այլ վկայությունը. «Յետ Արտաշիսի թագաւորէ Արտաւազդ որդի նորա, և հալածէ յԱյրարատոյ զամենայն եղբայրս իւր ի գաւառս Աղիովտայ և Առքերանոյ, զի մի բնակեսցեն յԱյրարատ ի կայրւածս արքայի»²:

Արշակունիների օրոք այս սկզբունքը չխախտվեց: Տիրան թագավորի ժամանակ արքունի սեպուհական տիրույթներում բնակվողների թիվն այնքան է ավելացել, որ թագավորն ստիպված է եղել նրանց հողերը վերաբաժանել ըստ մարդաթվի, որպեսզի արքունի տան մյուս սեպուհներն էլ հողեր ստանան Առքերանի և Աղիովիտ գավառներում³: Արշակ II-ի ժամանակ այդ սկզբունքը երբեմն խախտվել է, սակայն թագավորը մահվան սպառնալիքով հարկադրել է հավատարիմ մնալ ավանդական կարգին⁴:

Պատմահոր այս վկայություններից երևում է, որ Աղիովիտում, Առքերանիում, Հաշտյանքում բնակվող արքունի տան սեպուհները օժտված են եղել «պատուականագոյն», «առաւել թագաւորազն» առանձնաշնորհումներով: Հնարավոր է, որ այդ գավառները ի տիրություն են տրվել պայմանական հողակալության հիմունքներով, սակայն այս դեպքում ևս չէր փոխվում նրանց որպես արքունի տան առանձնաշնորհյալ անդամների (սեպուհների) հողատիրական իրավունքների բնույթը: Բնական է, որ նշված հողատիրությունները համապատասխանաբար կարող էին կոչվել սեպուհական կամ Վասպուրական համանշանակ անուններով, որոնք հայերենին են փոխանցվել հին պարսկերենից:

¹ Մովսէսի Խորենացու Պատմութիւն Հայոց, աշխ. Մ. Աբեղյան և Ս. Հարությունյան. Տրիփ-լիս, 1913, II, ԻԲ, էջ 137:

² Նույն տեղում, II, ԿԱ, էջ 191:

³ Նույն տեղում, II, ԿԲ, էջ 199:

⁴ Նույն տեղում, III, ԻԲ, էջ 282—283:

«Սեպուհ» (ստոհմի որդի) հասկացությունը ծագում է ղենդերեն «վիսոպուդրա» (կամ «վիսահպուդրա») բառից, որն ունի «իշխանական ստոհմի որդի» իմաստը կամ պահլավերեն «վիսպուր», «վիսպուս» («իշխան») բառերից։ Ն. Յա. Մառի կարծիքով «վիսոպուդրա» հայերենում պիտի դառնար «վիսահպուհ» կամ «վիսեպուհ», որը կորցնելով առաջին վանկը, դարձել է «սեպուհ»։ «Սեպահական»-ը պարթևական շրջանում պահլավերենում կոչվել է «վիսեպուրական», որն ունի «հատուկ», «մասնավոր», «անհատական» իմաստը։ Ըստ այդմ հայերեն մեպահական բառն ստեղծվել է ոչ թե սեպուհ բառից, այլ փոխառնված է պարթևերենից և նույնական է վիսեպուրականին⁶։ Ա. Փերիանյանի կարծիքով վասպուր հասկացությունը շունի արքայազն բառիմաստը, այն նշանակում է «հատուկ, մասնավոր դիրք ունեցող», որպիսին կարող էին լինել թագաժառանգը, ինչպես և արքայատոհմի մյուս անդամները։ Հենց վասպուր բառից էլ առաջացել է վասպուրական անունը, որը նշանակում է. ա) հատուկ դիրք ունեցող անձինք, որոնք մոտիկ էին կանգնած արքային, այլ խոսքով՝ պետության բարձրագույն վերնախավը, բ) թագավորի «հատուկ, մասնավոր ունեցվածքը», «անձնական կալվածքը»։ Հ. Հյուբշմանի կարծիքով պահլավերենում վասպուրական բառի տակ հասկացվել է բարձր ազնվականությունը, առանձնապես Իրանի նշանավոր յոթ տոհմերը⁷։ Նկատենք, որ Ագաթանգեղոսի մոտ «սեպահական» բառը ունի «ազնվական» իմաստը⁸։ Որոշ ուսումնասիրողներ Ստրաբոնի հիշատակած Բասորոպեդիա տեղանունը նույնացնում են Մեծ Հայքի Վասպուրական նահանգի հետ, որը, սակայն, չի հիմնավորվում։ Ստրաբոնը Բասորոպեդիայի տակ թերևս նկատի ունի Վասպուրական անունը, սակայն բոլորովին այլ երկրամասում. դատելով իր իսկ տրվյալներից, հավանաբար, Ատրպատականում։ Նման ենթադրության համար կովան կարող է ծառայել Ստրաբոնի այն վկայությունը, որի համաձայն հայոց Արտաշես I թագավորը Բասորոպեդիան գրավել է մեդացիներից՝ Կասպիանների և Փավնիտիսի հետ⁹։ Այս տեսակետից ուշագրավ է, որ Փավստոս Բուզանդի վկայությամբ, Ատրպատականում եղել է հայոց արքունի կալված¹¹, որը, հավանաբար, ունեցել է վասպուրական համարվող տիրույթների ստատուս։ Ընդ որում վասպուրական անունով տեղանուններ հիշվում են նաև ուրիշ երկրամասերում։ Այսպես, Իրանում, Սպահան քաղաքի շրջակա տարածքը Նախշիրուստամի արձանագրության մեջ հիշվում է Վիսպուրական անունով¹²։ Սպահանի շրջակայքը արքունի ոստան էր, որից և առաջացել է նրա վասպուրական անվանումը։ Հետաքրքիր է, որ արաբ աշխարհագիր Իդրիսին Իրանի Վերական նահանգում հիշում է Ասպուրական անունով բնակավայր¹³, որն, անշուշտ, նույնական է վասպուրականին։

Հայ մատենագրական աղբյուրներում հիշվող Մարդպետական երկիրը ներառում էր հետագայում ձևավորված Վասպուրական նահանգի զգալի մասը։ Աղբյուրների տվյալներից երևում է, որ Մարդպետականը կոչվել է նաև Սեպ-

⁶ Н. Я. Марр. Этимология армянского «сепуհ» и грузинского სეფე.—Записки восточного отделения имп. русс. Археологического общества, т. V, СПб., 1891, с. 288.

⁷ А. Периханян. Armeno-Iranica I. ՀՄՄՀ ԳԱ «Տեղեկագիր» (հաս. գիտ.), 1963, № 11, էջ 90.

⁸ Նույն տեղում, էջ 91:

⁹ Н. Hübschmann. Armenische Grammatik. Leipzig. 1895, S. 80.

¹⁰ Ագաթանգեղոս պատմիկի Հայոց, աշխ. Գ. Տեր-Մկրտչյան և Ստ. Կանայանց. Տիգրիս, 1909, ԻԲ, էջ 132:

¹¹ Страбон. География, изд. Г. А. Страгановский. Л., 1964, с. 498.

¹² Փաստոսի Բուզանդացու պատմիկին Հայոց. Ս. Պետերբուրգ. 1883, V, Ը, էջ 195:

¹³ А. Г. Периханян. Древнеармянские востаяики —Вестник древней истории, 1936, № 2, с. 52.

¹⁴ Geographie d'Edrisi, trad. par A. Jaubert. T. 1, Paris, 1940, p. 46).

հական գունդ անունով, որը նույնական է Վասպուրականին: Հետևաբար, վերջինս կոչվել է նաև Մարդպետական անունով: Այս կարծիքը ուժ է ստանում դարձյալ Մովսես Խորենացու վկայությունների շնորհիվ, որոնց համաձայն հայոց հին թագավորների տոհմակիցներն ունեցել են պաշտպանական գործառնություն: Հայոց Վաղարշակ թագավորը, գրում է պատմիչը, «գունդս և պահապանս դրան արքունի կարգէ ղշորս, զմի մի իւրաքանչիւր բիրովք վառելովք ի նոյն ի հին ի զարմից թագաւորացն՝ որք ի մերոյ նախնւոյն ի Հայկայ, որք բուն ոստանն անուանեալ, որք ընդ ժամանակս ժամանակս ժառանգութիւն ի հարանցն ընկալեալ գիւղս և դաստակերտս»¹⁴: Սակայն, ավելացնում է պատմագիրը, «աստ ուրեմն Պարսից թագաւորութեանն, որպէս լսեմ, այլս ոմանս յարուցեալ գունդս և ոստան անուանեալ. ոչ գիտեմ թէ վասն սպառնալով՝ ազգին առաջնոյ, թէ վասն ընդդիմութեան իրիք արդեօք չկապեալ և ի բաց ընկեցեալ զազգն՝ զայլս ի տեղի նոցա յարուցին գունդս՝ անուամբ արքունի: Այլ առաջինն հաստատ ի զարմից թագաւորացն առաջնոց. որպէս և այժմ ի Վրաց աշխարհին, որ սէփեծուն կոչի: Նա և ներքինիս հրամայէ ի նոյն ազգէ՝ իզել. և նահապետ նոցա զՀայր իշխան մասին յևտրպատականէ մինչև ցճուաշ և ցնախճաւան, և նահապետութեան ազգին սա մեծարոյ»¹⁵:

Մովսես Խորենացու այս վկայությունից երևում է, որ հին հայոց թագավորների սերունդներից կազմված են եղել արքունի դռան պահապան զնդեր, յուրաքանչյուրը տասը հազար հոգուց բաղկացած: Թագավորական այգ զարմիկները կոչվել են «բուն ոստան» և իրենց հայրերից ժառանգություն են ստացել գյուղեր և դաստակերտներ: Դժվար չէ կռահել, որ այստեղ խոսքը Արտաշեսյան արքայատոհմի սեպուհների մասին է, որոնք կոչվել են «բուն ոստան»: «Ոստանը» հին հայերենում ունեցել է արքունի կալված իմաստը (նույն իմաստն ունի նաև պահլավերենում): Մովսես Խորենացին, ինչպես տեսնում ենք, ոստան է կոչում հենց արքունի տան անդամների կալվածները: Իհարկե, արքունի դռան պահապան զնդերը, որոնց մասին, ինչպես տեսանք, հիշատակում է Մովսես Խորենացին, միայն արքունի տան անդամներից չէին համարված, արքունի տոհմի սերունդներն այդքան մեծ թիվ չէին կարող կազմել: Ուստի պետք է կարծել, որ պատմահայրն այստեղ նկատի ունի նաև արքունի տան հողատիրություններում բնակվող մանր ազատներին: Խորենացու վկայությունից կարելի է հետևեցնել, որ «բուն ոստան» կոչված ազատանին ավագանու նոր տեսակ էր, որը իր դերի, պաշտպանական հույժ կարևոր գործառնության շնորհիվ օժտված էր յուրատեսակ իրավունքներով: Պատմահոր այս վկայությունից հավաստվում է, որ թագավորական տնից սերած «ոստան» կոչվող ազատներին («ոստան ազատութիւն») Վիրքում կոչել են սեփեծուններ, որը նշանակում է «թագավորի որդիներ» և նույնական է հայերեն սեպուհ բառին:

«Ոստան ազատութեան» մասին Մովսես Խորենացին հիշում է նաև այլ առիթներով: Հայոց թագավոր Տիգրան Մեծը, հաղորդում է պատմագիրը, «յուդարկէ թագաւորապէս զքոյր իւր Տիգրանուհի մեծաւ ամբոխիւ ի Հայս, յաւանն՝ զոր շինեաց յիւր անուն Տիգրան, որ է Տիգրանակերտ, և զգաւառսն սայնոսիկ ի ծառայութիւն նմա հրամայէ: Եւ զոստանն անուանեալ կողմանցն այնոցիկ ազատութիւն ի զարմից սորա ասէ լեալս, իբր թագաւորական զարմս»¹⁶:

Ինչպես տեսնում ենք, Խորենացին հայոց թագավորի քրոջից սերված ազատներին, որպես թագավորական տան շառավիղների, կոչում է «ոստան»: Որն այդպիսով ունի «արքայատոհմից սերած սեպուհներ» իմաստը: Անշուշտ, պատմիչն այստեղ ի նկատի ունի նաև նշված զավառում եղած մյուս ազատներ:

¹⁴ Մովսես Խորենացի, II, է, էջ 111—112:

¹⁵ Նույն տեղում, էջ 112:

¹⁶ Նույն տեղում, I, I, էջ 82—83: Ուշագրավ է, որ Դվինի 648 թ. ժողովի մասնակից Մարդպետականի եպիսկոպոսը կոչվում է կրկնակ՝ «Ոստան և Մարդպետական» վերադիրներով (Պատմագիրը Հայոց, աշխ. Վ. Հակոբյանի. Բ, Երևան, 1971, էջ 214):

րին, որոնք ունեցել են թագավորական տան սեպուհների արտոնություններ: «Ոստան ազատութիւնը» փաստորեն ավագանու յուրատեսակ մի խավ էր, որն օժտված էր հատուկ արտոնություններով: Մովսես խորենացին շեշտում է այդ ինստիտուտի («ոստան ազատութեան») պատմական հաջորդականության փաստը, նշելով, որ հետագայում ստեղծվել են նաև ուրիշ գնդեր, որոնք նույնպես կոչվել են ոստան: Սակայն եթե առաջին դեպքում «ոստան ազատութիւնը» սերում էր հին Հայաստանի թագավորական տոհմից, իհարկե, նաև նրանց վասալ ազատներից, ապա այլ ծագում ունեւ հետագայում կազմավորված «ոստան ազատութիւնը», որը, ինչպես պատմագիրն է նշում, սերում էր Մարդպետական տոհմից և նրա գերակայությանը ենթակա ազատներից, որոնց տիրութենը տարածվել են Ատրպատականից մինչև Նախճավան: Ուշագրավ այս վկայությունից ելնելով կարելի է կարծել, որ արքայատոհմի անդամների (սեպուհների) իրավունքներով օժտված են եղել նաև ֆեոդալական այլ տոհմներից՝ սերած ազատներ, տվյալ դեպքում Մարդպետների տան անդամները, որոնք կատարել են երկրի արևելյան սահմանների պաշտպանությունն ապահովող ռազմաքաղաքական հատուկ պարտավորություններ: Նմանօրինակ առանձնաշնորհյալ կացության մեջ են եղել, անշուշտ, նաև Մարդպետների տոհմի իրավասության ոլորտում եղած հողատիրությունների հայրենատեր ֆեոդալները: Այսպիսով, թագավորական տոհմի անդամների իրավունքներ են ունեցել ոչ միայն Առեբրանի, Աղիովիտ և Հաշտյանք գավառների տերերը, այլև Մարդպետներին ենթակա ընդարձակ երկրամասի ֆեոդալական տիրությունների տերերը: Ընդ որում Մարդպետների գերակայության տակ եղած գավառները հայկական սկզբնաղբյուրներում կոչվում են Մարդպետական հավաքական անունով, որը, որքանով մեզ հայտնի է, օտար սկզբնաղբյուրներում չի հիշվում, ինչպես որ չեն հիշվում Հայաստանի բազմաթիվ այլ տեղանուններ: Ընդ որում II դարի հույն աշխարհագետ Կլավդիոս Պտղոմեոսը իր «Աշխարհագրական ձեռնարկում» նույնպես չի հիշում այս անունը: Վասպուրականի տարածքում նա հիշատակում է միայն Տոսպը և Մարդոյեն¹⁷ (μαρδοι), որը, դատելով հունարեն վերջավորությունից, պետք է լինեի ցեղանուն, տվյալ դեպքում՝ մարդ ցեղի բնակեցրած տարածքը: Բնական է, որ Պտղոմեոսը պետք է հիշատակեր այն անունները, որոնք իրեն ծանոթ են եղել օտար, տվյալ դեպքում իրեն մատչելի հունա-հռոմեական սկզբնաղբյուրներից, որտեղ, ինչպես հայտնի է, քանիցս հիշվում են մարդերը: Եթե ընդունենք, որ Պտղոմեոսը Մարդոյեի տակ նկատի ունի մարդ ցեղի բնակության շրջանը, ապա դժվար է ենթադրել, թե Վասպուրականի ողջ տարածքը ընդգրկվել է Մարդոյեի և Տոսպի մեջ: Բ. Հալկարկոսյանի կարծիքով Պտղոմեոսի օրոք և նրանից հետո երկար ժամանակ Վասպուրական աշխարհը բաժանված է եղել երկու մասի: Ընդ որում մինչև Կարմիր գետը տարածվող արևմտյան Վասպուրականը կազմել է Տոսպ աշխարհը, իսկ Կարմիր գետից դեպի արևելք ընկած մասը՝ Մարդոյեն, որը նաև նույնացնում է Մարդպետականի հետ¹⁸: Մ. Խաչատրյանի կարծիքով Մարդոյեն տարածվել է Կոտայքի, Սյունիքի, Ուրմիա լճի և Տոսպի միջև ընկած ընդարձակ տարածությունում¹⁹: Ստացվում է, թե իբր մարդերը բնակեցրել են այդ լայնատարած երկրամասը, որն, իհարկե, չի հաստատվում սկզբնաղբյուրներով:

Մարդոյեն, որպես ցեղանուն, բնական է, որ չի կարող նույնացվել Մարդպետականի հետ, որը հայտնի է միայն հայկական սկզբնաղբյուրներից և ներառում էր ոչ միայն մարդ ցեղի բնակության շրջանները, այլև, ինչպես կրտսենները ստորև, մի քանի նախարարական տների հայրենակալվածքներ:

¹⁷ Claudii Ptolemaei Geographia. Vol. II, ed. C. Mullerus. Paris, 1901, V, 12,9, p. 945.

¹⁸ Բ. Ն. Հարությունյան. Մեծ Հայքի Վասպուրական աշխարհը ըստ «Ախարհացոյց»-ի.—«Բանբեր Երևանի համալսարանի», 1983, № 3, էջ 120:

¹⁹ Մ. Մ. Խաչատրյան. Հայկական լեռնաշխարհը ըստ Պտղոմեոսի քարտեզագրական տվյալների.—«Պատմա-բանասիրական հանդես», 1980, № 2, էջ 208:

Այդ իսկ պատճառով Մարդպետական վարչաաշխարհագրական հասկացությունը հնարավոր չէ նույնացնել մարդ ցեղի բնակության շրջանների հետ: Բացի այդ, պատմարեմից մարգերի վերացումից հետո պահպանվեց Մարդաստան գավառանունը, որը, իհարկե, տարբեր է Մարդպետականից: Ուստի, եթե Մարդուն դիտենք նաև որպես աշխարհագրական որոշակի տարածք, ապա ավելի բնական կլինի այն նույնացնել Մարդաստանի հետ: Բացի այդ, որովհետև Մարդպետականը միայն մեկ տոհմի՝ Մարդպետների տիրույթը չէր, ուստի որպես աշխարհագրական հասկացություն այն հարատևեց նաև այդ տոհմի անկումից հետո: Որ Մարդպետականի կազմում եղել են մի քանի նախարարական տների ժառանգական հայրենիքը հանդիսացող գավառներ, հավաստվում է Մովսես Խորենացու հաղորդմամբ, որի համաձայն Մարացյան տոհմն իշխում էր Նախճավանում և նրանից հյուսիս ընկած շրջաններում²⁰: Պատմագիրը Մարդպետականի կազմում հիշում է նաև Ամատունիների, Ակեացիների տիրույթները: Այս վկայությունները թույլ են տալիս կարծելու, որ Մարդպետականի մեջ եղել են մի քանի տոհմերի հայրենակալածքներ: Այսպիսով, այդ ընդարձակ միավորի մեջ ընդգրկված տիրույթները ոչ թե մեկ տոհմի (Մարդպետների) իրավասության տակ էին, այլ մասնատված էին մի քանի ֆեոդալական իշխանությունների միջև, որոնց նկատմամբ, դատելով ըստ ամենայնի, Մարդպետները չեն ունեցել սեփականատիրական իրավունք, այլ օժտված են եղել լոկ ռազմաքաղաքական իրավազորությամբ, որի շնորհիվ նրանք միավորել են երկրամասի տարբեր տոհմերին և պաշտպանել Հայաստանի՝ Ատրպատականին հարող շրջանները: Մարդպետականի ազատագործը պաշտպանական իր կարևոր դերի բերումով, անշուշտ, ունեցել է առանձնաշնորհյալ կացություն, վերը նշված ոստան ազատների կամ արքունի տան սեպուհների իրավունքներ: Ըստ երևույթին այս է պատճառը, որ Գիրք թղթոցում Մարդպետականը համապատասխանաբար հիշվում է նաև Սեպհական գունդ²¹ անունով, որը նույնական է Վասպուրականին:

Հարկ է նշել, որ բացի Մարդպետականից, 591 թ. հետո կազմավորված Վասպուրական նահանգի տարածքում գոյություն են ունեցել մի քանի վարչաաշխարհագրական միավորներ: Ուշագրավ է, որ V դարի հայ մատենագիրների երկերում Վասպուրականի տարածքում հաշվում են Անձևացիք, Ռշտունիք, Տոսպ (այս երկուսը միասին երբեմն կոչվել են Տոսպոշտունիք), Գողթն, Առբերանի և ուրիշ գավառներ:

Այսպիսով, Արտաշիսյանների ժամանակ գոյություն ունեցող արքունի տան սեպուհների տիրույթներից բացի (որոնք, ինչպես նշեցինք, պետք է կոչվեն Վասպուրական), հայոց թագավորների կամքով ստեղծվել է գրեթե նույնիսկ Մարդպետական կամ Սեպհական գունդ վարչաաշխարհագրական միավորը, որի գերագույն իրավատերերն էին Մարդպետները, որոնց տոհմը, ինչպես ցույց են տալիս V դարի հայկական աղբյուրները, ամենաազդեցիկն էր Հայաստանում: Ըստ երևույթին Մարդպետները ունեին թագավորահոր պառտականություններ: Այս տեսակետից ուշագրավ է Փավստոս Բուզանդի հետևյալ արտահայտությունը. «...Դրակ մարդպետ, որ անուանեալ կոչէր ըստ գործոյն հայր թագաւորին»²², Հատկանշական է, որ նրանք գրեթե միշտ հիշվում են «հայր» վերագրումով: Հայտնի է, որ թագավորահայրը հույժ ազդեցիկ դեր ուներ միջնադարյան ֆեոդալական պետություններում (հիշենք Կիլիկիայի հայոց թագավորության մեջ թագավորահորը, կամ Վրաց Բագրատունիների պետության աթաբեկին և այլն): Անշուշտ, Մարդպետների այդպիսի առաջնակարգ դիրքը հետևանք էր նրանց պաշտոնի: Նույնիսկ եկեղեցական գործերում առկա էր Մարդպետների վճռորոշող միջամտությունը: Փավստոս Բուզանդի հավաստմամբ, երբ վախճանվում է հայոց Փառեն կաթողիկոսը, հայերը, կամե-

20 Մովսես Խորենացի, II, ԾԱ, էջ 180—181:

21 Գիրք թղթոց. Թիֆլիս, 1901, էջ 73, 151:

22 Փավստոս Բուզանդ, V, 2, էջ 170:

նալով Աղբիանոսի տոհմից ոմն Շահակի դարձնել հայոց հայրապետ, «տան զնա ի ձեռս իշխանին Մարդպետութեան, որում անուն իւր հայր կոչէր»²³։ Որպես թագավորահայրեր, Մարդպետները մեծ ազդեցություն ունեին երկրի ներսում և հաճախ ուղղություն էին տալիս նրա ներքաղաքական կյանքին։ Փավստոս Բուզանդը վկայում է, որ մարդպետի հորդորանքով Արշակունի հայոց Տիրան թագավորը կոտորել տվեց բազում նախարարներ²⁴։ Ուշագրավ է, որ ներսես կաթողիկոսին ձեռնադրելու նպատակով Կեսարիա մեկնած հայ նախարարների մեջ առաջին տեղում հիշվում է մարդպետը՝ «մեծ իշխան» պատվատիրոջն ունով։ Ծիշտ է, «մեծ իշխան» են անվանվում նաև Սոփաց տերը և Բագարատ սպարապետը, սակայն նրանց մեջ առաջինը մարդպետն է (Մեծ իշխանի ինստիտուտը հարատևեց նաև հետագա դարերում)։ Ընդ որում թե՛ խորենացու և թե՛ Փավստոս Բուզանդի մոտ կենտրոնախույս ուժերի դեմ անհաշտ պայքար մղողների դերով գրեթե միշտ հանդես էին գալիս Մարդպետները։ Նրանց սադրանքով հատկապես ժանր հաշվհարդար կատարվեց Վասպուրականի երկու զորեղագույն տոհմերի՝ Արծրունիների և Ռշտունիների նրկատմամբ։ Այս հանգամանքը, ինչպես կարելի է դատել ըստ ժամանակակից սկզբնաղբյուրների, հիշյալ տոհմերի և Մարդպետների միջև խորը թշնամանքի դուռ բացեց, որի արտահայտությունն էր, անշուշտ, Շավասպ Արծրունու ձեռքով մարդպետի սպանության փաստը²⁵։

Փավստոս Բուզանդի վկայություններից երևում է, որ Արշակ II-ի օրոք մարդպետի իրավասության ոլորտը չէր սահմանափակվում միայն Մարդպետականով, այլ տարածվում էր նաև Տարոնի ու հարակից շրջանների վրա²⁶։ Այս հանգամանքը չէր կարող Մարդպետների նկատմամբ չհարուցել հայոց կաթողիկոսի թշնամանքը, քանի որ նույն պատմիչի վկայությամբ, Տարոնը կաթողիկոսի ձեռական (սեփական) տիրույթն էր։ Հարկ է նշել, որ Տարոնի նկատմամբ ևս Մարդպետների իրավասությունը կրել է միայն քաղաքական բնույթ։ Ուշագրավ է, որ Փավստոս Բուզանդը Տարոնի Ողական ամրոցի տեր է համարում Մամիկոնյան իշխանին։ Անշուշտ, Տարոնը, որպես մարդպետի իրավասությանը ենթակա գավառ, նույնպես պետք է ունենար վերջիններիս տիրույթներին հատուկ բնորոշ արտոնություններ և համապատասխանաբար արքունի ոստանի, սեպհական (կամ վասպուրական) գնդի իրավասություն։ Այս տեսակետից խիստ ուշագրավ է, որ IV—VII դդ. հայոց եկեղեցու պատմությունը շարադրող մի սկզբնաղբյուրում, որը մեզ է հասել հունարեն թարգմանությամբ և հայտնի է Դիեգեսիս անունով, Տարոնի Աշտիշատ գյուղին կից հիշվում է Ասպրակոն անունը («Աշտիշատ գյուղի Ասպրակոնից»)։ Թեև Ժ. Գարիտը կարծում է, թե Ասպրակոնը նույնական է ագարակներ բառին, սակայն, ինչպես ճիշտ կերպով նշել է Մարկվարտը, Դիեգեսիսում հիշվող Ասպրակոնը Վասպուրական անվան հելլենականացված ձևն է²⁸։ Նկատենք, որ Դիեգեսիսի մեջ հիշվում է Ասպրակոնի տարընթերցվածքը՝ Ասպրականոն ձևով²⁹, ինչը նույնպես վկայում է Ասպրակոն-Վասպուրականի աղբյուրի մասին։

Վերոշարադրյալից ելնելով, կարելի է կարծել, որ Մարդպետների գերակայությամբ ենթակա գավառները օգտվել են արքունի սեպուհներին պատկանող տիրույթների իրավասությունից, որի հետևանքով, ինչպես տեսանք, Մարդպետականը կոչվել է նաև Սեպհական գունդ, ինչը համանշանակ է Վաս-

²³ Նույն տեղում, III, ԺԷ, էջ 39։

²⁴ Նույն տեղում, ԺԸ, էջ 40—41։

²⁵ Նույն տեղում, IV, ԺԴ, էջ 98։

²⁶ Փավստոս Բուզանդ, էջ 97։

²⁷ G. Garitte. La Narratio de rebus Armeniae, ed., critique et Commentaire.—Corpus Scriptorum Christianorum orientalium, vol. 132, subs., t. IV, Louvain, 1952, p. 27.

²⁸ J. Markwart. Die Entstehung der armenischen Bisümer. Roma, 1932, S. 207.

²⁹ G. Garitte. Un nouveau Manuscrit de la Narratio de rebus Armeniae.—Le Muséon, Louvain, 1953, p. 251.

պուրականին: Սրանով պետք է բացատրել Մովսես Խորենացու կողմից Վասպուրական անվան հիշատակումը: Պատմագրի այդ վկայության մեջ ասվում է. «Եւ քանզի զաւակ ոչ գոյր Արտաւազդայ՝ արքա թողու յԵրախնաւու զամենայն տունն Արտաւազդայ... Զոր սիրեալ արքայի՝ տայ նմա զգահն երկրորդական, զոր ունէրն Արտաւազդ, և զհոգս արեւելեան զօրուն ի նա հաւատացեալ՝ առ նմա թողու զԴրուասպ ոմն պարսիկ զմտերիմ իւր, որ խնամեցեալ էր ընդ նախարարս Վասպուրականի, ուրում տուեալ էր զաւանն Տատեօնս հանդերձ ադարակօքն...»³⁰: Պատմիչի այս խոսքերից կարելի է մակարերել, որ հայոց թագավորի տիրույթներից ժառանգություն է թողնվել Երախնաւու իշխանին, որին են վստահվել նաև արևելյան զորքի հոգսերը: Արևելյան զորք ասելով պատմիչն անշուշտ ի նկատի ունի Հայաստանի՝ Իրանին հարող արևելյան գավառների պաշտպանության գործը կազմակերպող Մարդպետների զորագնդերը: Ըստ երևույթին Երախնավուն պետք է լիներ Մարդպետների տոհմի ազդեցիկ անդամներից մեկը: Այն, որ Երախնավուն գլխավորել է Հայաստանի արևելյան կողմերում տեղակայված զորքը, հավանաբար, պատճառ է դարձել, որպեսզի նրա ենթակայության տակ թողնվի Դրվասպ անունով պարսիկ իշխանը: Սակայն հայոց թագավորը, ինչպես երևում է Մովսես Խորենացու նույն վկայությունից, Դրվասպին վստահել է նաև այն պատճառով, որ նա խնամիական կապեր ուներ Իրանին մոտ ընկած Վասպուրականի նախարարների հետ: Հարց է առաջանում՝ Վասպուրականի տակ պատմիչը ո՞ր երկրամասը ի նկատի ունի: Անշուշտ, ոչ հետագայում (591 թ. հետո) կազմավորված Վասպուրական նահանգի տարածքը, որտեղ, ինչպես կտեսնենք ստորև, V դարում եղել են, բացի Խորենացու հիշած Վասպուրականից, նաև այլ միավորներ: Սակայն Մովսես Խորենացին չի հիշատակում Մարդպետական անունը, թեև խոսում է և՛ Մարդպետների, և՛ նրանց իրավասության, դերի մասին: Ինչու՞ վ կարծիք է բացատրել այս փաստը: Հավանաբար նրանով, որ Մարդպետականի փոխառն նա գործածել է այլ անուն: Տվյալ դեպքում այդ անունը պետք է լիներ Վասպուրականը. այդ են հուշում պատմիչի վերոհիշյալ վկայության մեջ եղած տվյալները: Պատմագրի վկայությունից երևում է նաև, որ Վասպուրականում եղել են ոչ թե մեկ, այլ մի քանի նախարարներ:

Վերևում մենք տեսանք, որ իրոք, բացի Մարդպետներից Մարդպետականում կային նաև նշանավոր այլ տոհմեր (Մարացյան, Ամատունի, Ակեացի և այլն): Բացի այդ, նույն հաղորդումից հավաստվում է, որ Վասպուրականը որոշակի աշխարհագրական և վարչաքաղաքական հասկացություն է, որն ընդգրկում էր Ֆեոդալական մի քանի իշխանություններ: Որ Մարդպետներին վրստահվել էր Հայաստանի՝ Իրանին հարող մասերի պաշտպանությունը, վկայում է նաև Փավստոս Բուզանդը, ըստ որի Դղակ (Գղակ) մարդպետը հայոց արքայի կանցով նշանակվել էր սահմանապահ ի Գանձակ՝ որ էր սահման ընդ Պարս և ընդ Հայս: Եւ մնաց առ նմա երեսուն հազար ընտիր ընտիրք...»³¹, ինչպես տեսնում ենք, Մարդպետներին էր վստահվել Հայաստանի պաշտպանության գործը երկրի այդ կարևորագույն շրջանում: Ըստ երևույթին, հենց այս հանգամանքի շնորհիվ Մարդպետները ձեռք բերեցին հայոց Արշակունի թագավորների մեծ վստահությունը: Իրենց հերթին Մարդպետները գրեթե միշտ համատարիս էին հայոց Արշակունի թագավորներին: Բավական է ասել, որ նրանք հետևողականորեն պայքար էին տանում երկրի կենտրոնախույս ուժերի դեմ և հետևում էին Արշակունիների քաղաքական ուղեգծին թե՛ արտաքին և թե՛ ներքին հարաբերություններում: Սակայն Արտագերս բերդում Փառանձեմ թագուհու պաշարված ժամանակ, եթե հենվենք Փավստոս Բուզանդի հաղորդման վրա³², մարդպետի վերաբերմունքը հայոց թագուհու հանդեպ դժգոհու-

³⁰ Մովսես Խորենացի, II, 48, էջ 194:

³¹ Փավստոս Բուզանդ, V, 2, էջ 170:

³² Փավստոս Բուզանդի հավաստմամբ, մարդպետը մտել է Արտագերս, Փառանձեմ թագուհու մոտ և խիստ նախատել Արշակունի թագավորներին այն բանի համար, որ նրանք կորցրել

թյուն է հարուցել Պապ թագավորի և իր կողմնակիցների շրջանում: Այսպես կարծելուն հիմք է տալիս այն հանգամանքը, որ ինչպես նշում է Փավստոս Բուղանդը, Պապի օրոք մարդպետը հիշվում է Մամիկոնյան իշխանից հետո³³: Հավանաբար Մարդպետները ընդդիմացել են Պապի քաղաքականությանը, որի հետևանքով վերջինս խիստ սահմանափակել է նրանց իրավունքները: Այս տեսակետից ուշագրավ է, որ Պապի հրամանով մարդպետը նույնիսկ սպանվել է³⁴:

Համաձայն Փավստոս Բուղանդի մեկ այլ տեղեկության, Արշակ II-ի ժամանակ Մարդպետների իրավասության տակ է եղել նաև Անգեղտուն գավառը, որի բերդերի պահպանությունը վստահվել է Դրաստամատին՝ այդ նույն տոհմից³⁵: Ուշագրավ է, որ թեև նույն ժամանակ Աղձնիքի բղբշխը ապստամբել էր հայոց թագավորի դեմ³⁶, սակայն Դրաստամատը շարունակեց հավատարմորեն ծառայել հայոց թագավորին: Ընդ որում Անգեղտուն գավառը նույնպես Փավստոս Բուղանդի մոտ հիշվում է որպես արքունի ոստան³⁷: Ինչպես երևում է, Մարդպետների տիրույթների առանձնաշնորհյալ վիճակը տարածվել է նաև այս գավառի վրա:

Հայտնի է, որ Արշակունիների անկումից հետո Մարդպետների տոհմը վերացավ պատմական ասպարեզից: Այս տոհմի անդամները, դատելով ըստ ժամանակակից աղբյուրների կցկտուր տվյալների, մտան Արծրունյաց տոհմի հովանավորության տակ: Թերևս այս է պատճառը, որ Ղազար Փարպեցին 450—451 թթ. ժողովրդաաղատագրական պատերազմի ժամանակ Արծրունյաց զորքի հրամանատար ներշապուհին (Մերշապուհ) անվանում է մարդպետ³⁸: Սակայն պետք է կարծել, որ Մարդպետների իրավասության ոլորտում դրսևրվող գավառները պահպանել են իրենց արտոնությունները, արքունի սեփականության իրենց ստատուսը: Հնարավոր է, որ Արշակունի տոհմի շառավիղները նույնպես պահպանած լինեն նման իրավունքներ: Որ Արշակունիների սերունդները շարունակել են Հայաստանում գոյատևել նաև 428 թ. հետո, երևում է Նղիշեի վկայություններից: Այսպես, թվելով Ավարայրի ճակատամարտում զոհվածներին, Նղիշեն հիշում է նաև նրանց մեջ չյարքունի տան» ներկայացուցիչներին³⁹: Ընդ որում պատմագիրը արքունի տան անդամներին հիշում է նաև այլ առիթով՝ կալանված հայ նախարարների մասին խոսելիս: Ուշագրավ է, որ Նղիշեն Արշակունի շառավիղներին չի հիշում որպես նախարարների: Խոսելով Ավարայրի ճակատամարտում զոհվածների մասին, պատմիչն ասում է. «Այս երեսուն և հինգ արք, են որ յաւագ նախարարացն, և են որ ի կրսերագունիցն, սակայն ամենեքեան ըստ մարմնոյ են նախարարագունք, իսկ ըստ հոգևոր առաքինութեանն ամենեքեան երկնային քաղաքացիք: Եւ բազում ևս այլ ազատ մարդիկ, են որ յարքունի տանէ, և են որ ի տանէ նախարարացն իսկ նոցուն, նիզակակիցք և մարտակիցք քաջ նահատակացն»⁴⁰:

Անշուշտ, ի դեմս արքունի տան և նախարարական տոհմերի ազատների, Նղիշեն ի նկատի ունի Արշակունի և այլ տոհմերի սեպուհներին: Թե՛ Նղիշեի և թե՛ Ղազար Փարպեցու տվյալներից երևում է, որ Արշակունյաց տոհմի շա-

են հայոց աշխարհը, ապա հեռացել է (Փավստոս Բուղանդ, IV, ԾԾ, էջ 145), որից հետո բերդը հանձնվել է պարսիկներին:

33 Նույն տեղում, V, ԼԳ, էջ 197:

34 Նույն տեղում, Զ, էջ 172:

35 Նույն տեղում, էջ 173:

36 Նույն տեղում, ԺԸ, էջ 178:

37 Նույն տեղում:

38 Ղազարայ Փարպեցու Պատմութիւն Հայոց, աշխ. Գ. Տեր-Մկրտչյանի և Ստ. Մալխասյանի. Տփղիս, 1904, II, ԼԹ, էջ 71:

39 Նղիշեի Վասն Վարդանայ եւ հայոց պատերազմին, աշխ. Ե. Տէր-Մինասեան. Երևան, 1957, V, էջ 120:

40 Նույն տեղում, էջ 194:

թերեւ կարելի է հետեւեցնել, որ Արծրունիները Արշակունիներից հետո տիրացել են ոչ միայն Մարդապետների հողատիրությունների մի մասին, այլև նրանց բարձակալական (այստեղից նրանց առաջնակարգ տեղը Գահնամակում) իրավունքներին: Անշուշտ, Մարդապետների գործառնությունը՝ թագավորահոր պարտավորությունը, ինքնաբերաբար վերացավ Արշակունիների անկման հետ: Եվ եթե այս բնագավառը շտառանգվեց (եթե չկար թագավոր, չէր կարող լինել նաև թագավորահոր գործակալությունը), ապա նույնը չի կարելի ասել Հայաստանի ֆեոդալական աստիճանակարգում Մարդապետների դիրքի, նրանց բարձակալական իրավունքների մասին, որոնց, ինչպես նշեցինք, տիրացել էին Արծրունիները: Մարդապետների անկումից հետո պահպանվել է Մարդապետական վարչաշխարհագրական հասկացությունը: Այս մասին վկայում են «Գիրք թղթոցում» եղած տվյալները⁴⁴: Ընդ որում տարբեր են Մարդապետականի և Արծրունյաց իշխանության եպիսկոպոսները: Ուշագրություն է գրավում մեկ այլ հանգամանք: Մարդապետականի եպիսկոպոսները երբեմն կոչվում են Սեպհական զնդի Էպիսկոպոսներ⁴⁵, մինչդեռ Արծրունյաց եպիսկոպոսները բնավ չեն հիշվում այդ անվան տակ: Այս փաստից կարելի է հետևեցնել, որ մինչև 591 թ., երբ Հայաստանը բաժանվեց Իրանի և Բյուզանդիայի միջև, Արծրունիների տիրույթները չընդգրկվեցին Սեպհական զնդի (Մարդապետականի) կազմի մեջ և որ հետագա Վասպուրական նահանգի տարածքի մի զգալի մասն ընդգրկող իշխանությունները շարունակեցին կոչվել Մարդապետական կամ Սեպհական գունդ հավաքական անուններով: Որքան որ Սեպհական հասկացությունը նույնական է Վասպուրական անվան հետ, ուստի կարելի է կարծել, որ Մարդապետականը կոչվել է ոչ միայն Սեպհական գունդ, այլև Վասպուրական, Վասպուրական գունդ համիմաստ ձևերով: Ուշագրավ է, որ Սեբեոս պատմիչի մոտ Սեպհական գունդը (կամ Կողմն Սեպհական զնդին) անունը հիշվում է նաև Վասպուրական գունդ ձևով⁴⁶, Իհարկե, 591 թ. հետո ձևավորված Վասպուրական նահանգը, ինչպես կոնստանդնուպոլսի, ավելի մեծ տարածություն էր ընդգրկում: Այս իրողությունը ցայտունորեն երևում է «Գիրք թղթոցի» պարունակած մի քանի տվյալներից: VI դարի կեսի անցքերի առնչությամբ այդ ժողովածուի մեջ Մարդապետական եպիսկոպոսի հետ կողք-կողքի հիշվում են նաև Արծրունյաց, Ամատունյաց, Պալունյաց, Անձևացյաց իշխանությունների եպիսկոպոսները: Այդ իշխանությունների զբաղեցրած տարածքները, համաձայն VII դարի աշխարհացույցի, ընդգրկված էին Վասպուրական նահանգի մեջ⁴⁷: Մինչդեռ, ինչպես պետք է հետևեցնել «Գիրք թղթոցի» վերոնշյալ տվյալներից, հիշյալ իշխանությունները չեն մտել Մարդապետականի կազմի մեջ: «Գիրք թղթոցի» մեջ եղած այլ տեղեկություններ նույնպես հավաստում են այդ փրողությունը⁴⁸: Ուշագրավ է նաև այն պարագան, որ թեև Արշակունիների անկումից հետո Մարդապետների տոհմը վերացավ, սակայն նրանց տիրույթները շարունակեցին կոչվել Մարդապետական, ընդհուպ մինչև VII դարը, երբ դրա փոխարեն գործածվեց միայն Վասպուրական անունը:

591 թ. հետո Հայաստանում ծավալված իրադարձությունների առնչությամբ Սեբեոսը, ինչպես նշեցինք վերևում, Վասպուրականը հիշում է Սեպհական գունդ, Կողմն Սեպհական զնդին և Վասպուրական գունդ համանշանակ անուններով: Սակայն այստեղ նա նկատի ունի ոչ միայն Մարդապետականը, այլև ամբողջ Վասպուրական նահանգը: Սկզբնապես Սեբեոսը այս անունը հիշում է արաբական զորքի՝ դեպի Հայաստան կատարած առաջին արշավանքի առընչությամբ: Այդ հաղորդումից իմանում ենք, որ երբ ճեկն զարն Իսմայելի յԱտրպատական, և բաժանեցան յերիս: Առաջ մի յԱյրարատ, և առաջ մի

⁴⁴ Գիրք թղթոց, էջ 41, 73, 147, 151 և այլն:

⁴⁵ Նույն տեղում, էջ 41, 73 և այլն:

⁴⁶ Պատմութիւն Սեբեոսի, աշխ. Գ. Վ. Արզարյանի. Երևան, 1979, ժԲ, էջ 84:

⁴⁷ Ս. Տ. Երեմյան. Հայաստանը ըստ «Աշխարհացույց»-ի. Երևան, 1983, էջ 108—109:

⁴⁸ Գիրք թղթոց, էջ 41, 70 և այլն:

ի Սեպհական գնդին կողմանսն, և առաջի մի յԱղուանս: Արդ՝ որք ի կողմանս Սեպհական գնդին արշաւեալ սփռեցան և հարեալ զամենայն կողմանսն զայնոսիկ սրով սուսերի, առին զաւար և զգերութիւն: Եւ եկին ժողովեցան ի Հէրեան, և մարտեան ընդ բերդին, և ոչ կաղացին առնուլ: Եկին ի յՈրդսպու և ոչ նմա ինչ կարացին առնել: Գնացին անտի և բանակեցան յԱրծափս...»⁴⁹: Ստացվում է, որ դեպի Սեպհական գնդի կողմերն արշաված արաբական զորաբանակը հայտնվել է Երևանի տակ, որը, ինչպես հայտնի է, Վասպուրականում չէ: Այս հանգամանքը տեղիք է տվել տարբեր մեկնությունների, որոնց նպատակն է եղել Սեբեոսի հիշատակած յԵրեւմանը անպայման փնտրել Սեպհական գնդի կողմերում՝ Վասպուրականում⁵⁰: Սակայն Սեբեոսի այս և ուրիշ վկայություններից երևում է, որ Սեպհական գնդի կողմն արշաված զորաբանակին կարող էր Վասպուրականը գրավելուց հետո հասնել Երևան, որը հեռու էր Վասպուրականի նախնական գավառից⁵¹: Սեբեոսի նույն վկայությունից երևում է, որ արաբական զորքը ամբողջապես գրավել է Սեպհական գնդի տարածքը, նոր ապա թափանցել Այրարատ: Այստեղ ծառանում է մեկ այլ հաջորդական ի՞նչ էր անում դեպի Այրարատ արշավող զորաբանակը: Այս հարցին կարելի է պատասխանել, հենվելով Սեբեոսի մեկ այլ վկայության վրա: «Բնակ այն զաւրն,— գրում է պատմիչը,— որն ի կողմանս այրարատեան, եհար սրով մինչև ի կողմանս Տայոց, Վրաց և Աղուանից»⁵²: Ուրեմն դեպի Այրարատ արշավող զորքի բուն նպատակը Տայոց, Վրաց և նույնիսկ Աղվանից աշխարհներին տիրելն էր, որից հետո, ըստ Սեբեոսի տեղեկության, այսպես կոչված այրարատյան և Սեպհական գնդի կողմն արշաված զորախմբերը, իրենց առջև դրված խնդիրները կատարելուց հետո, ըստ երևույթին, պետք է միանային Այրարատում: Եվ իրոք, Տայքը, Վիրքն ու Աղվանքն ասպատակելուց հետո Այրարատի կողմերն արշավող զորքը «էանց ի նախնական առ այն զաւր, որ մարտ եղեալ կռուէին ընդ բերդին նախնական»⁵³: Նախնականը մտնում էր Վասպուրականի մեջ, հետևաբար, նրա պարիսպների տակ մարտեր մղողը պետք է լիներ հենց դեպի Սեպհական գնդի կողմերն արշաված զորքը, որն ինչպես տեսանք, մինչ այդ պաշարել էր Երևանը: Ուշագրավ է Սեպհական գնդի կողմանքի մեկ այլ հիշատակություն Սեբեոսի մոտ: VI դարի կեսին Բյուզանդիայի Կոստանդին կայսրը զորքով արշավում է Հայաստան՝ կամենալով գրավել այն: Նրան հպատակություն են հայտնում Սպերի, Մանանդիի, Դարանաղիի, Եկեղյաց, Կարինի, Տայքի, Բասենի, Վանանդի, Շիրակի, Խորխունցաց, Դիմաքսյան տների, Այրարատի տարբեր գավառների իշխանները, որոնք կայսեր իրազեկ են դարձնում «զկամս ապստամբութեան Ռշտունեաց տեառն և փութանակի երթեկս առ նա դեսպանացն Իսմայելի»⁵⁴, ինչպես տեսնում ենք, Վասպուրականի իշխաններից կամ հոգևորականներից ոչ ոք չի հիշվում կայսեր հնազանդվողների մեջ: Ապստամբ է համարվում Ռշտունյաց տերը: Ռշտունիքը Վասպուրականի գավառներից էր, որն, ինչպես տեսանք, չէր մտնում «Գիրք թղթոցում» հիշատակված Մարդպետականի կամ Սեպհական գնդի մեջ: Մինչդեռ Սեբեոսի տվյալներից երևում է, որ 650-ական թթ. Ռշտունիքը, Աղթամարը նույնպես Սեպհական գնդի մասն են կազմել:

⁴⁹ Սեբեոս, ԽԴ, էջ 145: Սեպհական գնդի և Վասպուրականի նույնության մասին տե՛ս Բ. Խ. Ավդալբեգյան. Հայագիտական հետազոտություններ. Երևան, 1963, էջ 141—147:

⁵⁰ Բ. Խ. Ավդալբեգյան. նշվ. աշխ., էջ 146—147:

⁵¹ Բ. Խ. Ավդալբեգյանը (նույն տեղում, էջ 47) կարծում է, որ դեպի Վասպուրական արաբական հիշյալ զորախմբի ռազմաօդային պետք է ձգվեր հարավից Հյուսիս, սկզբնականում ունենալով Առեստը: Սակայն այն փաստը, որ նշված զորամասը դուրս եկավ Ատրպատականից, բացառում է նման հնարավորությունը: Բացի այդ, Առեստը բերդ չի ունեցել, մինչդեռ Երևանը հիշվում է որպես բերդ:

⁵² Սեբեոս, ԽԵ, էջ 146:

⁵³ Նույն տեղում:

⁵⁴ Նույն տեղում, ԽԸ, էջ 165:

Պատմիչը նշում է, որ կայսրը Մուշեղ Մամիկոնյանի գլխավորությամբ զորք է ուղարկում Սեպական գնդի կողմերը, ապստամբ Ռշտունյաց իշխանին պատժելու⁵⁵։ Հետեւաբար Ոշտունիքը մտել է Սեպական գնդի կազմի մեջ։ Հանդամանք, որը վկայում է Սեպական գնդի սահմանների ընդլայնման մասին։ Քանի որ 591 թ. կազմավորված Վասպուրական նահանգը հիմնականում ընդգրկում էր Սեպական գնդի (Մարգալետականի) տարածքը, ուստի սկզբնական շրջանում Վասպուրական նահանգը կոչվեց Սեպական գունդ կամ Կողմն Սեպական գնդին անունով։ Ծանցյալ արարական տիրապետության հաստատումից հետո (VII դարի վերջին) այդ անունը կորցրեց իր նշանակությունը։ Նրա փոխարեն օգտագործվեց Վասպուրական անունը (VII դարի Աշխարհացույցում Սեպական գունդ անունը չի հիշվում)։

ИЗ ИСТОРИИ ВОЗНИКНОВЕНИЯ АДМИНИСТРАТИВНО-ГЕОГРАФИЧЕСКОЙ ЕДИНИЦЫ ВАСПУРАКАН

В. М. ВАРДАНЯН

Резюме

Свидетельства источников дают основание полагать, что Васпуракан как географическое и административное понятие существовал в эпоху Арташесидов, когда провинции Алновит, Арберанн и Аштянк считались царскими доменами, где утверждали членов царского рода (*сепухов*). Поэтому эти провинции могли называться Сепухаканом, или Васпураканом, в отличие от других регионов. Привилегиями царских сепухов («востан азатутюн») пользовались и члены рода Мардпетов, а также и зависимые от них князья. Соответственно их владения называли собирательными именами—Сепакап гунд, Мардпетакан, Васпуракан. При этом Мардпетакан не был собственностью одного рода, но состоял из владений нескольких родов. Над этими владениями Мардпеты не имели феодального сюзеренитета и лишь политически объединяли князей данного региона для выполнения своей функции—обороны восточных границ Армении. Возможно, в определенный период провинции Алновит, Арберанн и Аштянк были включены в состав Сепакап гунда, или Мардпетакана, так как Мардпеты пользовались большим влиянием и, вероятно, имели политический сюзеренитет также над владениями царских сепухов. Васпуракан, упоминаемый у Мовсеса Хоренаци, идентичен Сепакап гуиду, или Мардпетакану. Однако его территория была более ограниченной по сравнению с областью Васпуракан, представленной в армянской географии VII века. Даже в середине VI в. Рштуник, Андзевацик, владения Арцрунидов и других родов фигурируют отдельно от Сепакап гунда, или Васпуракана (Мардпетакана), между тем все эти земли после 591 года входили в состав Васпураканской области. Но так как основную часть области Васпуракан составляли провинции, входившие в Сепакап гунд, Васпураканская область в начальный период называлась Сепакап гундом, или Васпуракан гундом. Имя Мардпетакан сохранилось лишь в религиозной сфере: церковь бывшего Сепакап гунда, или Мардпетакана, вплоть до X в. называлась именем Мардпетакан и упоминается отдельно от других епископств.

⁵⁵ Նույն տեղում, էջ 146։